

Listovi...

Listao:
Omer Hamzić

Omer HAMZIĆ

**Listovi gračaničkog
kalendara od 1. 11. 2002.
do 16. 5. 2003.**

15. 11. 2002.

**NA PUTU GRAČANICA – MA-
LEŽIĆI: JOŽ TRI KILOMETRA AS-
FALTA**

Uloženo je 256.000 KM iz Budžeta općine Gračanica i Kantonalne direkcije za puteve. Asfaltiranje ove saobraćajnice nastavlja se sljedeće godine.

21. 11. 2002.

**NASTAVLJA SE REGULACIJA SO-
KOLUŽE**

Radovi se izvode na dijelu korita od mosta kod "Žitokombinata" do mosta "Rampa" u ukupnoj dužini od 420 metara. U finansiranju projekta učestvuju Javno preduzeće za vodno područje "Slivovi rijeke Save", Direkcija voda Tuzla i Općina Gračanica. Radove izvođe radnici Rudnika željezne rude "Vareš" iz Vareša.

28. 11. 2002.

**DVADESET OSMA SJEDNICA
OPĆINSKOG VIJEĆA GRAČANICA:
REBALANS BUDŽETA ZA 2002. I
PRVA PROJEKCIJA BUDŽETA ZA
2003. GODINU**

Jedan od razloga za donošenje rebalansa je uvođenje poreza na promet proizvoda i usluga u građevinarstvu i preraspodjela prihoda u cijeni nafte i naftnih derivata u korist općine. Budžet za 2003. godinu planira se u iznosu od 5.598.000 KM, što predstavlja povećanje od 15,7%. Planirano povećanje "oslanja" se na povećanje poreskih prihoda iz poljoprivrede, poreza na dobit, te na neke neporezne izvore.

26. 11. 2002.

IZAŠAO PRVI BROJ "GRAČANIČ-KIH NOVINA"

Prije tridesetak godina, pod okriljem tadašnje Opštinske konferencije Socijalističkog saveza, pojavio se "Gračanički list" kao prvi printani medij na ovoj općini. Izašao je samo jedan (probni) broj, do čijeg je primjerka danas jako teško doći. Od 1979. do 1984. godine prilično redovno izlazilo je glasilo pod naslovom "Delegatski bilten", koji je donosio ne samo informacije iz skupštinskog života, već i ostale aktuelnosti s prostora ove općine. Izdavač "Delegatskog biltena" bio je Narodni univerzitet, a "radila" ga je Redakcija Radio Gračanice. Nakon izbora 1990. godine, u Gračanicu se pojavljuje prva privatna novina pod naslovom "Istina". Izašlo je svega nekoliko brojeva te novine, koju je kao urednik i vlasnik potpisivao ovdašnji novinar Fadil Buljubašić. Sredinom 1993. godine, u vrijeme najteže blokade, u vrlo teškim ratnim uslovima, grupa novinara i entuzijasta pokreće list "Biljeg vremena" koji je, sa povremenim prekidima, izlazio od 1. 9. 1993. (prvi broj) do decembra 1995. godine, kada je izašao posljednji, 22. broj tog glasila. Osnivač glasila bila je Skupština opštine Gračanica, funkciju v.d. direktora "Biljega" obavljao je rahm. Dževad Sarajlić, a glavni i odgovorni urednik Mehmed Nurikić.

U kraćem uvodniku, povodom prvog broja "Gračaničkih novina", najavljeno je da će novina izlaziti jedanput mjesečno i, između ostalog, zapisano sljedeće: "Kažu da što nije zapisano, nije se ni dogodilo. A u Gračanicu se mnogo toga događa pa je prava šteta to i ne zapisati. Nismo sigurno jedini koji želimo i na ovaj način pisati dio istorije ovog kraja. To je prvi razlog pojavljivanja "Gračaničkih novina". Drugi razlog je: naša namjera da uspostavimo među nama bolju komunikaciju. Čini

nam se da su se veze među ljudima počele prekidati. Zbog čega? Ovaj list će dat svoj doprinos ponovnom uspostavljanju pokidanih veza. Prvi uslov je da imamo objektivnu informaciju, lišenu bilo kakvih boja. Nikako političkih! Samo prirodnih. Izdavač ovih novina smatra da je ovaj vid realizacije vlastitog programa rada pogodan i primjeren. Želimo dati doprinos stvaranju nove kulture življenja u kojem se dosta toga očekuje od pojedinca." Izdavač novine je "Forum" Gračanica, a kao glavni i odgovorni urednik potpisuje se Mehmed Imširović.

5. 12. 2002.

PONOVO PRORADILI SEMAFORI NA PUTU TUZLA – DOBOJ, JUŽNI ULAZ U GRAČANICU

Ugašeni su u trenutku kad je "planuo" rat na ovom području i nakon 10 godina ponovo stavljeni u funkciju. Sredstva za njihovo instaliranje u iznosu od oko 40.000 KM zajednički su obezbijedili: Općina Gračanica i Kantonalna direkcija za puteve. Sa donacijom se u ovu akciju uključio francuski Flori Lezobre, sa kojim Gračanica ostvaruje dugogodišnju prijateljsku saradnju.

5. 12. 2002.

MUHAMED IBRAHIMOVIĆ IZABRAN ZA PREDSEDNIKA PREDSTAVNIČKOG DOMA PARLAMENTARNE SKUPŠTINE FEDERACIJE BIH

Rođen je 1960. u Stjepan Polju. Diplomirao je na Odsjeku orijentalistike Filozofskog fakulteta u Prištini. Obavljao je više odgovornih političkih dužnosti u okviru općine Gračanica i Tuzlanskog kantona. (predsjednik SDA općine Gračanica, sekretar Sekretarijata za narodnu odbranu, ministar u Vladi Tuzlanskog kantona, načelnik općine Gračanica).

6. 12. 2002.

**“EUROGALANT” GRAČANICA:
VRIJEDNOST PROIZVODNE 3,3
MILIONA KM ILI 7% VIŽE U OD-
NOSU NA PRETHODNU GODINU**

...uglavnom izvoz, prodor na nova tržišta, više zaposlenih. Od svog samog početka, “Eurogalant” je skoro cjelokupnu svoju proizvodnju kožne galanterije plasirao na švajcarsko tržište. “Naredne godine planiramo povećanje proizvodnje i izvoza za 15%, jer smo ove godine, osim švicarskog, ostvarili prodor na slovenačko tržište, a nedavno i u SAD. Preko Atlantika smo uputili prvu pošiljku, kojom su američki kupci zadovoljni. Do kraja godine sa njima ćemo, vjerovatno, potpisati ugovor o izvozu”, izjavio je za sarajevsko “Oslobodjenje” direktor i vlasnik “Eurogalanta” Senahid Smajlović.

8. 12. 2002.

ASFALTIRAN PUT DO ŽKAHOVICE

Radi se o 2,6 kilometara asfaltnog puta u čijem su finansiranju sa 60% učestvovali sami mještani, dok je ostatak sredstava obezbijedila kantonalna direkcija za puteve i Općina Gračanica.

26. 12. 2002.

**DVADESET DEVETA SJEDNICA
OPĆINSKOG VIJEĆA GRAČANICA:
UKUPNO RASPOLOŽIVA SRED-
STVA PO PLANU BUDŽETA ZA 2003.
GODINU PLANIRAJU SE U IZNOSU
OD 5.806.000 KM, POZITIVNO OCI-
JENJEN RAD OPĆINSKOG NAČEL-
NIKA U 2002. I PODRŽAN PRO-
GRAM NJEGOVOG RADA ZA 2003.**

Vijeće je usvojilo Nacrt prostornog plana općine Gračanica i Nacrt odluke o provođenju prostornog plana općine Gračanica. Javna rasprava o tim značajnim razvojnim dokumentima trajat će 6 mjeseci.

4. 1. 2003.

**GRAČANIČKA “FORTUNA”: UGO-
VORENA PROIZVODNJA ZA PRVA
TRI MJESECA, UGLAVNOM ZA TA-
LIJANSKO I SLOVENAČKO
TRŽIŠTE**

“Ako bude sve kako smo planirali, ove godine proizvest ćemo milion pari obuće. Najvažnije je da se radi, da posla ima, a tvrdim da smo najveća tvornica za proizvodnju obuće u BiH. Nosimo se sa problemima i čini nam se da ih uspješno savladujemo”, izjavio je za “Dnevni avaz” Ibrahim Muharemović, tehnički direktor ove mnogoljudne firme, koja zapošljava oko 1000 radnika.

15. 1. 2003.

**GRAČANIČKI “PREPOROD” U 2002.
GODINI: NAJAKTIVNIJI PJESNICI I
SLIKARI**

U izdanju ovog društva pojavilo se šest zbirki pjesama, čiji su autori. Ismet Suljić (“Od izvora pa do ušća”), Atif Brkićević (“Poruke istine”), Sajiba Šabić-Skelić (“Uz čarobnu kutiju”), Hajrija Bećirović (“Kazivanja iz tame”) i Nisveta Kantardžić (“Prozori srca”). Uz likovne izložbe, Društvo je priredilo i šest kataloga sljedećih svojih slikara: Refke Čajić, Marije Babović, Milene Šabić-Andrejić, Amire Tataragić i Enesa Imamovića.

31. 1. 2003.

**TRIDESETA SJEDNICA OPĆIN-
SKOG VIJEĆA GRAČANICA: PRI-
JEDLOG ZA OSNIVANJE MJESNE
ZAJEDNICE TRNOVCI, INFORMA-
CIJA I BEZBJEDNOST SAOBRAĆA-
JA I IZVJEŽTAJI IZ BKC**

Podaci iz informacije Policijske uprave Gračanica potvrđuju ono što i sami građani znaju: bezbjednost saobraćaja na putevima ove općine se pogoršava. Navode se i brojni uzroci koji se moraju otklanjati koordiniranom akcijom više odgovornih subjekata: od

organa vlasti, pa do prosvjetnih ustanova, ali samih građana – aktivnih sudionika u saobraćaju. Vijećnici su prihvatili izvještaj o radu BKC i Radio Gračanice u prošloj godini kao i programsku šemu Radio Gračanice za tekuću godinu. Vijećnici su usvojili Odluku o prihvatanju Prijedloga za osnivanje Mjesne zajednice Trnovci, koji se u osnovi svodi na izdvajanje tog naselja sa 270 domaćinstava iz sastava Mjesne zajednice Džakule.

31. 1. 2003.

IZABRANI SPORTISTI GRAČANICE 2002.

U kategoriji najmlađih sportista, za najbolje su proglašeni Melisa Kamberović (Ženski odbojkaški klub "Gračanica") i Damir Omerović (Nogometni klub "Bratstvo"), najbolji kadeti su Alisa Sarajlić (Karate klub "Gračanica Nesam") i Mirza Pindžić (Nogometni klub "Gračanica"). Za najbolje sportiste u ženskoj i muškoj konkurenciji proglašeni su Lejla Nurikić (Ženski odbojkaški klub "Gračanica") i Darko Mehmedović (Odbojkaški klub "Gračanica 2000". Za najboljeg trenera proglašen je Muhidin Halilović (Ženski odbojkaški klub "Gračanica"), a za najboljeg sportskog radnika Nusret Helić (Nogometni klub "Bratstvo"). Za najboljeg sportistu invalida proglašen je Abdulah Nurić (Malonogometni klub ratnih vojnih invalida Gračanica). Za najbolji ženski kolektiv proglašen je Ženski odbojkaški klub "Gračanica", a za najbolji muški kolektiv Odbojkaški klub "Gračanica 2000". Specijalna priznanja za doprinos razvoju sporta u općini Gračanica dobili su Dafija Gopo, Salih Pindžić i Mujo Hasić.

10. 2. 2003.

"KOKO DŽADA" GRAČANICA: 2002. GODINA U ZNAKU POSLOVNE EKSPANZIJE

To se, prije svega, ogleda u rastu ukupnog prihoda koji je u 2001. iznosio 5,7 miliona, a samo za devet mjeseci 2002. dostigao je 8,1 milion KM. Procjene su da će za cijelu 2002. doći 11 miliona KM. Znači, rast proizvodnje i prodaje iznosili su oko 95%. Broj zaposlenih sa 14 radnika krajem 1991. godine, porastao je na 40 krajem 1992. U sredstva rada, a najviše u vozni park, uloženo je oko 500.000 KM. Preduzeće radi sa 70 ko-operanata iz cijele Bosne i Hercegovine, od Pala i Sarajeva do Dervente. Od početka novembra 2002. godine, "Koko Džada" je postala vlasnik savremene klaonice u Živinica-ma, koja će zapošljavati još 55 radnika. U prošloj godini, na lokalitetu Pribava, započeta je izgradnja farme za tov 80.000 pilića u jednom turnusu, u koju je do sada uloženo oko milion KM vlastitih sredstava. Objekat će biti pušten u rad do polovine sljedeće godine.

7. 2. 2003.

MUHAMED SELIMOVIĆ, NOVI-STARI PREDSEDNIK GRAČANIČKOG SDP

To je odluka većine prisutnih na sjednici opštinske izvještajno-izborne konferencije SDP BiH Gračanica, koja je izabrala novo predsjedništvo i usvojila ambiciozan Program rada za naredni period.

1. 3. 2003.

TRIDESET PRVA SJEDNICA OPĆINSKOG VIJEĆA GRAČANICA: IZMJENE URBANISTIČKOG I REGULACIONOG PLANA "JUG I" I PLANA PARCELACIJE LOKACIJE "HUSANOVIĆI"

...kojom se mijenja namjena površine i umjesto ranije kolektivno-stambene zone

predviđa zona individualno-stambene gradnje. Utvrđuje se i trasa saobraćajnica i veličina, oblik i položaj parcele, pristup parcelama, regulacione linije i površine za javne namjene. Usvojene su i sljedeće odluke: Odluka o izmjeni Odluke o naknadama za korištenje podataka i vršenje usluga premjera katastra nekretnina i katastra zemljišta, Odluka o izmjeni i dopuni Poslovnika Općinskog vijeća Općine Gračanica, Odluka o izmjeni Odluke o naknadi za pripremu i izdavanje urbanističke saglasnosti, Odluka o namjeni utroška sredstava iz koncesionih naknada itd.

12. 3. 2003.

GRAČANIČKA SAHAT-KULA DOBILA NOVI "KROV NAD GLAVOM"

Na inicijativu načelnika općine Gračanica, započeta je djelimična sanacija sahat-kule koja je, na neki način, dio identiteta ovoga grada. Krov od bakarnog lima donirala je renomirana gračanička zanatska radnja "Limorad", uskoro treba da se postave vrata, potom satovi... Općinska oprava tako, na najbolji način, najavljuje početak ozbiljnije aktivnosti na zaštiti kulturno-historijskih spomenika na ovoj općini.

31. 3. 2003.

TRIDESET DRUGA SJEDNICA OPĆINSKOG VIJEĆA GRAČANICA: USVOJEN PROGRAM ULAGANJA U INFRASTRUKTURNE OBJEKTE PO MJESNIM ZAJEDNICAMA NA OPĆINI U 2003. GODINI

... i informacije: o efektima privatizacije na općini Gračanica u 2002. godini, o realizaciji programâ rada vijeća mjesnih zajednica, o radu Teritorijalne vatrogasne jedinice i o kulturno-historijskim spomenicima i spomen-obilježjima na području općine.

23. 4. 2003.

FIKRET-EF. PAŽANOVIĆ, GLAVNI IMAM MEDŽLISA ISLAMSKJE ZAJEDNICE GRAČANICA - NOVI PREDSJEDNIK SKUPŠTINE UDRUŽENJA ILMIJE BIH

To je odluka konstituirajuće sjednice ove staleške organizacije, koja okuplja, takozvani, učeni sloj Islamske zajednice u Bosni i Hercegovini i ima svoj poseban program rada, izvršne organe itd. Tu visoku funkciju ef. Pašano-
vić obavljat će u naredne četiri godine.

29. 4. 2003.

TRIDESET TREĆA SJEDNICA OPĆINSKOG VIJEĆA GRAČANICA: ODLUKA O DAVANJU SAGLASNOSTI ZA KANDIDOVANJE PROJEKTA KOD SVJETSKJE BANKE I IZVJEŠTAJI O RADU JAVNIH PREDUZEĆA I USTANOVA OD OPĆINSKOG ZNAČAJA U PROŽLOJ GODINI

Kandidovano je pet projekata, u ukupnoj vrijednosti od 1.500.000 KM: Projekat regulacije korita rijeke Sokoluše i nastavak izgradnje kolektora, Projekat postavljanja tri semafora u gradu, Projekat izgradnje alternativnog ulaza u grad "Lipinac", Projekat izgradnje lokalnih puteva u mjesnim zajednicama Soko, Vranovići, Malešići, Lukavica, Džakule i Rašljeva, Projekat preprojektovanja i daljeg privođenja namjeni privredno-kulturno-sportskog centra u Gračanici (PKSC-a). Donesena je i Odluka o kriterijima za raspodjelu sredstava ostvarenih po osnovu prodaje nafte i naftnih derivata mjesnim zajednicama, namjenski za održavanje, zaštitu, obnovu, rekonstrukciju i izgradnju nekategorisanih puteva na njihovim područjima.

15. 5. 2003.

OTKRIVENA SPOMEN-PLOČA CIVILNIM ŽRTVAMA RATA NA LOKA-



Načelnik općine Gračainca Nusret Helić i predsjednik Opštinske organizacije civilnih žrtava rata Sead Begović: detalj sa svečanosti otkrivanja spomen-obilježja (Snimio H. Čalić)

LITETU BIJELA POLJA U GRAČANICI

Incijator i organizator izgradnje spomenika je Udruženje građana civilnih žrtava rata općine Gračanica, a pomogli su brojni pojedinci, preduzeća i ustanove iz Gračanice. Na tom mjestu, 15. maja, 1992. godine, SDS teroristi iz Srpske Varoši ubili su Adema Mustajbašića iz Gračanice, koji je sa grupom pripadnika lokalne jedinice Civilne zaštite radio sa bagerom na prosijecanju puta prema Drafićima, kao alternativnog izlaza za eventualnu evakuaciju stanovništva iz Gračanice u pravcu Srebrenika. Mustajbašić je bio prva civilna žrtva rata na prostoru Gračanice. Taj događaj je široko odjeknuo u Gračanici i upozorio Gračanlije da ono najgore tek dolazi. Spomenik, na kojem je ispisano 127 imena poginulih civila (žena, djece, penzionera), podsjeća i opominje: da se to najgore ne ponovi i da se ne zaboravi. "Ovakva spomen-obilježja trajno će nas podsjećati na jedno teško vrijeme stradanja civila, djece, žena –

samo zato što su neizmjerljivo voljeli ovu zemlju, što su joj do kraja ostali vjerni i odani. Ovo spomen-obilježje budućim generacijama bit će svojevrsno svjedočanstvo o borbi za tu ideju, za plemenite ciljeve Bosne. Sjetimo se samo koliko nam je značio dječji osmijeh ili dječja igra u pustom gradu u rijetkim trenucima ratnog zatišja, između dvije sirene, između dva granatiranja. Ovdje, na ovim prostorima, život

dostojan čovjeka izašao je kao pobjednik", rekao je, između ostalog, načelnik općine Gračanica Nusret Helić prilikom otkrivanja spomen-obilježja na Bijelim poljima.

16. 5. 2003.

ŽESTI FESTIVAL DJEČJEG DRAMSKOG STVARALAŽTVA BOSNE I HERCEGOVINE U GRAČANICI

...otvoren je predstavom "Zaljubljenik", koju su izveli učenici Osnovne škole iz Stjepan Polja. Potom je nastupilo Amatersko pozorište "Neretva" iz Konjica ("Brod sa zelenom bradom") te mladi glumci Osnovne škole iz Donjeg Vakufa ("Pepeljuga"). U naredna dva dana Festivala gračaničkoj pozorišnoj publici predstavili su se sljedeći ansambli: "Sartr", Škola lutkarstva iz Sarajeva ("Moj Romeo i moja Julija"), Osnovna škola iz Gornjeg Vakufa ("Šta te muči Tamaguči"), Osnovna škola i Lutkarsko pozorište iz Ugljevika ("Basnoslovni omnibus"), Osnovne škole "Hasan Kikić" sarajevo ("Sve moje furke"), Dramski studio Bosanskog kulturnog centra



Foto Šako Gračanica

Tuzla ("Čudnovate zgrade šegrta Hlapića"), Pozorište mladih iz Ljubinja ("Nema Gradac u Americu"), Osnovna škola "Simin Han" Tuzla ("Hajde da smijeh pravimo"), Društveni omladinski centar Bijelo Polje – Mostar ("Pobuna"), Dramski studio KUD "Adem Alić" Gračanica ("Mali princ"), Mostarski teatar mladih ("Morska priča"), Osnovna škola "Lukavac grad" Lukavac ("Smrt Omera i Merime") i Dječji studio glume "Roda" iz Banja Luke ("Ljubavni jadi Ježa Ježića"). Tokom tri dana Festivala ljubitelji pozorišta imali su priliku da vide 15 predstava u kojima je "igralo" preko 220 mladih glumaca. Za najbolju glumačku ekipu proglašen je Dramski studio BKC Tuzla.

16. 5. 2003.

KONAČNO, SATOVI NA SAHAT-KULI U GRAČANICI, SATNI MEHANIZAM POSLJEDNJI MODEL ELEKTRONSKE TEHNIKE, OPŽTINA ULOŽILA 30.000 KM

Time se ne završava, već nastavlja aktivnost na rekonstrukciji tog starog zdanja gračaničke čaršije, čije je autentično urbano jezgro djelimično sačuvano do danas. Hroničari su zabilježili da se Gračanica počela ubrzano razvijati nakon dolaska Turaka (1520.), da je stekla status kasabe (grada) prije 1548.), te da je potom postala sjedište prostranog kadiluka, trgovačko-zanatski i kulturno-obrazovni centar šire regije. Poslije 1686. godine u Gračanicu je doselio Ahmed-paša Budimlija (po nekima će, kasnije, postati bosanski valija), za čije se ime vezuje izgradnja nekoliko značajnih objekata, po kojima je gračanička čaršija i danas prepoznatljiva. Pored hamama (javnog kupatila) i velikog hana (prenočišta), kojih odavno više nema, najvažniji su: Ahemd-pašina (Bijela) džamija i sahat kula kao simbol današnje Gračanice. Sahat-kula je masivna kamena građevina, kvadratne osnove, visoka 27 metara, unutrašnje dimenzije sahat kule su cca 150x150 cm. Jedna je od tri najviše kamene sahat-kule u Bosni i Hercegovini. Znatno je oštećena u velikom požaru 1812. godine, u kojem je izgorjelo i javno kupatilo i spomenuti han. Kasnije je u nekoliko navrata obnavljana i renovirana, posljednji puta 1974. godine.

Ne znamo pouzdano kad su u prošlosti prestali otkucati sata s gračaničke sahat-kule, ali znamo da će se od danas "pa nadalje i ubuduće" (kad su kazaljke, najzad, krenule) u Gračanicu bolje mjeriti (i cijeniti). vrijeme. Jer, Gračanlije, najzad "shvataju (i vide) koliko je sati!" Nema više kašnjenja. ‘